



Rapport annual da la Quarta Lingua

Il program accumpagnant da la radunanza generala dals 21 da mars 2007 è stà sut l'ensaina dal teater rumantsch. Il referat da Giovanni Netzer, purtader da l'anè da Hans Reinhard, e la discussiun ch'è suandada èn stads in success cumplain.

Il puncts centrals da las activitads da la QL sa laschan resumar en trais gruppas: la lavur vid agens projects, dumondas da contribuziuns sco era la collavuraziun cun organisaziun che han medemamain la finamira da promover la lingua e cultura ordaifer il territori rumantsch.

Il project dal QUADERN che ha la finamira dad edir l'emprima giada texts curts dad auturas ed auturs giuven da lingua rumantscha vegn a cumparair la primavera 2008 en rumantsch grischun e tudestg. Edituras cuminaivlas èn la Quarta Lingua e la GiuRu. I n'è betg stà simpel da recaltgar finanzas.

L'entschatta da l'onn ha la QL prendì si contact cun il departament da scola da la citad da Turitg per eruir la pussaivladad da porscher curs da rumantsch per scolars da la scola populara e lur geniturs. Bainbaud èsi sa mussà ch'i n'è betg pussaivel da cuntanscher questa finamira sin via directa. Il uffants da scola che vivan a Turitg e ch'han ragischs rumantschas n'èn betg registrads adequatamain. La finamira da la QL èsi, en collavuraziun cun la citad da Turitg, da sa drizzar sur ils scolasts da la scola populara a quels uffants che han ragischs u demussan simpatia per nosa cultura e lingua rumantscha. La direziun dal departament da scola e la conferenza da scolasts da la citad da Turitg han decis da sustegnair in perfecziunament supplementar per scolasts sin basa voluntaria tar il tema Rumantschia e da surpigliar ils custs che sa resultan ordlonder. Il curs vegn scrit ora ina segunda giada il settember 2008, damai ch'il curs ch'è stà previs per l'atun 2007 ha stuì vegnir spustà causa da las paucas annunzias (probablmain è il termin d'annunzia per il curs per 2007 stà memia curt).

En collavuraziun cun la LR ha la QL lantschà en la gasetta d'uffants JUNIOR in project spezial per ils lecturs e las lecturas. Quel cuntegna ina seria d'engiavineras, nua ch'i vala d'engiavinar in pled rumantsch. Quella pagina d'engiavineras duaja esser in'avischinaziun al rumantsch dals uffants e giuvenils da lingua tudestga en questa gasetta fitg derasada. La QL ha mess a disposiziun CHF 2'000.- per las emprimas trais ediziuns.

Analog als onns precedents ha la QL era sustegnì l'onn da rapport diversas ovas litteraras e preschentaziuns musicalas. Ella ha pajà contribuziuns a Nies Tschespet 2007, a l'ediziun da poesias Viva la veta - Es lebe das Leben da Dumeni Capeder (rumantsch e tudestg), a la translaziun rumantscha da "Tod in Sils Maria" dad Ulrich Knellwolf, a l'ovra quadrilingua Anemona Alva da Vic Hendry, als Dis da litteratura a Domat, al cudesch da poesias "Ei dat ils muments da pass lev - Zeiten leichtfüssigen Schritts" d'Arnold Spescha, al project 100 onns Armon Cantieni ed al giubileum da 100 onns Chor viril Sursés. En tut ha la QL concedì contribuziuns en valita da CHF 21'550.- (incl. las contribuziuns al project Il Quadern).

En il rom dad ina meglra collavuraziun tranter la QL e l'URB è vegnì creà ina pagina d'internet cuminaivla (www.quartalingua.ch). Plinavant vegnan la QL e l'URB a far ensem la radunanza generala da l'onn 2008.

Suenter otg onns sco president da la QL remet jau mes mandat e surdun quel en mauns pli giuven. Jau engrazièl a tuttas e tuts che m'han sustegnì en quels onns. In spezial engraziament admet jau a mes activs consuprastantAs sco era a la Lia Rumantscha, che ha adina ureglias avertas per noss giavischs.

Anton Killias, president

Suprastanza:

President:	Anton Killias, Turitg
Vicepresident:	lic. oec. HSG Kaspar Silberschmidt, Turitg
Actuar:	dr. Linus Bühler, Oberrieden
AssessurAs:	dr. med. Anna Marie Hew, Turitg Barbara Kürz, Turitg

Madlaina Peer, Turitg
dr. Roman Truog, Turitg

DelegAs: lic. oec. HSG Kaspar Silberschmidt
Madlaina Peer

Suppleant: dr. Roman Truog